

Apequteqaat aallavigalugu oqallisissaq, qanoq iliorluta aatsitassat nunatsinnut nunaqavissunullu iluaqutaanerulersinnaavagut?

(Inatsisartunut ilaasortaq, Mariane Paviasen, Inuit Ataqatigiit)

Akissuteqaat

(Aatsitassanut Inatsisillu Atuutsinneqarnerannut Naalakkersuisoq)

Siullermeerneqarnera

2010-mi aatsitassanut suliassaqrifiup tiguneqarnerani Kalaallit Nunaata annertunerusumik uuliasiorsinnaanera annertooujussuarmik naatsorsuutigineqarsimavoq.

Aammalumi nunani tamalaani uuliasiornermut ingerlatseqatigiiffiit angisuut tamaasa kajungilersinnissaat iluatsippoq, kisianni angusaqartoqannginnerani taakkua tamarmik Kalaallit Nunaata imartaa qimappaat aammalu sumiiffiit imminut akilersinnaanerusut allat ukkatarineqalerlutik. Tamanna Naalakkersuisut kinguneqartippaat aammalu maannakkut aatsitassanut suliassaqrifik mingutsitsinngitsumillu nukissiorneq ukkatarilerlugu.

Taamaattumik unikaallannissaq aammalu Kalaallit Nunaata siunissami aatsitassarsiornermi misigisassarsiornissaanut suut naatsorsuutiginerlutigu pisariaqartumik oqaloqatigiissutiginnissaa Naalakkersuisut pingaartippaat. Taamaattumik siunissami aatsitassarsiornermut inuussutissarsiornermut partiit naatsorsuutigisaasa neriutaasalu inersuarmi maani tusagaqarfiginissaannut periarfissaq Naalakkersuisut tigulluarpaat.

Nunap iluaniit pisuussutinit Aatsitassarsiornermi aningaasaateqarfimmi aningaasarpassuarnik ileqqaartoqarnissaa Naalakkersuisut suli pingaarnertigut anguniagaraat. Piffinni immaqa allanik isertitaqarnissamut periarfissaqarfiunngitsuni atugassanik meeqqatsinnut ernuttatsinnullu ileqqaartoqassaaq.

Naalakkersuisut neriutigaat anguniakkap annertuup taassuma angunissaanut pingaarnersiuinissaq isumaqatigiissutigisinnaagippat.

2013-imi Aatsitassanut ikummatissanullu inatsimmi Annikitsumik aatsitassarsiornermik suliaqarnissamut maleruagassiisoqarpoq. Maleruagassiineq pisinnaatitsissummik pigisaqartunut iliuuseqarfigiuminaatsoq paasinarsisimalluni. Maleruagassat taakkua Naalakkersuisut nunaqavissut soqutigisaannik pisinnaatitaaffiinillu pingaartitsinerannut ersarissumik takussutissaappat. Taamaattoq taakkua suli pitsaanerulersinnaappat.

Maannakkut ukiut 12-it nammineq akisussaaffeqareerlutik, maleruagasseereerlutik aammalu aatsitassanut suliassaqrifimmi misilittagaqarnerujussuannqoreerlutik Naalakkersuisut inatsisinik pitsannorsaamissamik suliaqarneq aallartippaat. Maannakkorpiaq upernaamut ataatsimiinnermi saqqummiunneqartussaq aatsitassanut inatsimmut nutaamut missingiut

suliarineqareerpoq. Annikitsumik aatsitassarsiornermut inatsit aamma suliarineqarpoq, kisianni aatsaat ukiaanerani ataatsimiinnissamut Inatsisartunut saqqummiunneqartussaalluni.

Aatsitassarsiornermut suliassaqaarfik annertoorsuarnik iluatsitsiviusimangilaq, immaqqa ilaasa naatsorsuutigisimagaluagaattut. Piffissami niuerfiup ataatsimut isigalugu unammilligassaqaarfiunerani aatsitassarsiorfinni ingerlatassat minnerusut marluk aallartinneqarsimapput. Nunanit allamiut aningaasaliinissaannut nunarsuarmi niuerfimmi neqerooruteqaarnerit ujartuinerillu apeqqutaasarput, tamannalu ukiuni marlussunni kingullerni ajornakusoorsimavoq.

Nunami sumiiffinni politikkikkut inissisimanerup pissutsit allanngortippasippai, taamaalilluni ujartuineq annertusilluni. Kisianni aningaasaliisartut nunami ingerlasunik annikitsuinnarmik aatsitassarsiorfinnik ingerlatsiviusumi aningaasaliiniarlutik siulliuniutinngillat, taamaattumillu aatsitassarsiorluni misissuinermi suliassat ineriartortinnissaannut piffissaqaarnissaq pisariaqartinneqarpoq. Ingerlatseqatigiiffinnut aatsitassarsiorluni misissuinermik suliqaartunut piumasaaqatigisartakkatsinni, Kalaallit Nunaat suli aatsitassarsiorfiusutut ingerlallualersimangitsoq, takuneqarsinnaavoq. Aallarnisarnermiippugut. Suliffissuaqaarnermik nutaamik pilersitsiniarnermut piffissamik nukissanillu atuisariaqarpoq. Tamanna ukiualuinnaat ingerlaneranni pisinnaangilaq. Tamanna aamma annikitsumik aatsitassarsiornermut suliassaqaarfimmu atuuppoq.

Annikitsumik aatsitassarsiornermut suliassaqaarfik innuttaasut tungaanniit aalajaatsumik soqutigineqarsimavoq. Suli ikittuinnaat tamanna inuuniutigisinnaavaat. Nammineq piginnaasaqaarnerput aallaavigalugu suliassaqaarfimmi tassani soqutiginninneq ineriartornerlu siuarsarneqarsinnaasariaqarput. Assersuutigalugu entreprenøritut inuussutissarsiornermi ingerlatseqatigiiffeqarpoq inoqarlunilu aatsitassarsiorfimmik ingerlatsisinnaasunik aammalu aatsitassarsiorlutik misissuisinnaasunik. Qanoq iliorluni taakkua aatsitassarsiorluni ingelatassani peqataatissinnaavagut?

Naalakkersuisut kalaallit innuttaasut suliqaarnerat akuutinneqarnerallu tapersorsorusuppaat. Ingerlatseqatigiiffiit aatsitassarsiorluni misissuinermik suliqaartartut anginerusut aammalu annikitsumik aatsitassarsiornermik suliqaartartut minnerusut inissaqartinnissaat, aningaasaqaarnikkut siumut ingerlanissatsinnut pingaaruteqarpoq. Ujaqqanik pinnerasaasiassanik allanillu aatsitassanik najukkani piiaanermik pilersitsisoqarsinnaanissaannut akimmiffilersuisoqassanngilaq.

Naalakkersuisut siunnersuuteqartoq qulequttamik pingaaruteqartumik oqaluuserisassanngortitsineranut qutsavigaat, neriutugalugulu Inatsisartunut ilaasortaniit neriulluarnartunik amerlasuunik ilanngussassaqaartoqarumaartoq.